



GIG
CYMRU
NHS
WALES

Iechyd Cyhoeddus
Cymru
Public Health
Wales

Iechyd Cyhoeddus Cymru

Rhif 2 Capital Quarter, Stryd Tyndall,
Caerdydd CF10 4BZ

Public Health Wales

Number 2 Capital Quarter, Tyndall Street,
Cardiff CF10 4BZ

Tracey Cooper

TC
12 Ionawr 2022

Russell George, AS
Cadeirydd y Pwyllgor Iechyd a Gofal Cymdeithasol
Senedd Cymru
Bae Caerdydd,
Caerdydd, CF99 1SN

Annwyl Russell,

Fframwaith Cyffredin Dros Dro:

Diogelu Iechyd y Cyhoedd a Diogelwch Iechyd

Diolch i chi am wahodd barn Iechyd Cyhoeddus Cymru i lywio'r gwaith o graffu ar *Fframwaith Cyffredin Diogelu Iechyd y Cyhoedd a Diogelwch Iechyd* gan y Pwyllgor Iechyd a Gofal Cymdeithasol.

1 Cefndir

Drwy gyd-destun, mae Iechyd Cyhoeddus Cymru wedi bod yn rhan o ddatblygu'r Fframwaith Cyffredin a Rheoliadau Diogelwch Iechyd cysylltiedig (Ymadael â'r Undeb Ewropeaidd (UE)) 2021, ers 2018. Cychwynnodd yr ymgysylltiad hwn fel rhan o'r dull strwythuredig o Bontio'r UE ac mae wedi parhau fel rhan o'r trefniadau cydweithio y cytunwyd arnynt ar gyfer Diogelu Iechyd ar draws y pedair Cenedl.

Yn ystod y cyfnod hwn, rydym wedi gweithio'n agos gyda Swyddogion Llywodraeth Cymru. Felly, mae ein hymateb yn croesgyfeirio at ymateb y Gweinidog Iechyd a Gwasanaethau Cymdeithasol er mwyn peidio â dyblygu atebion a chynorthwyo'r Pwyllgor yn ei waith.

Cychwynnodd ein cyfraniad yn 2018 drwy fynychu Gweithgor Pontio UE Diogelu Iechyd Pedair Cenedl a sefydlwyd i oruchwylio'r trefniadau pontio diogelu iechyd. Roedd y grŵp hwn yn cynnwys aelodaeth o asiantaethau iechyd y cyhoedd o Gymru, Lloegr, yr Alban a Gogledd Iwerddon, ynghyd â chynrychiolwyr o bob adran gyfatebol o'r Llywodraeth. Cytunodd Iechyd Cyhoeddus Cymru i gadeirio'r grŵp Pedair Cenedl hwn, gan weithio gydag ysgrifenyddiaeth i gefnogi Public Health England (PHE) ar y pryd. Parhawyd i gadeirio'r grŵp hwn gennym tan 1 Ebrill 2021 pan ddisodlwyd y grŵp, yn unol â'r cytundeb cydweithredol a amlinellwyd yn y Fframwaith Cyffredin, gan Grŵp Goruchwylio Diogelu Iechyd y Pedair Cenedl, yn adrodd i Bwyllgor Diogelu Iechyd y DU. Gofynnwyd i Iechyd Cyhoeddus Cymru gadeirio'r Grŵp Goruchwylio newydd hwn eto yn ei flwyddyn gyntaf a byddwn yn parhau i wneud hynny tan fis Ebrill 2022.

Mae'r grwpiau hyn wedi hwyluso ystyried y Fframwaith a'r Rheoliadau Cyffredin yn ystod gwahanol gamau eu datblygiad yn arwain at eu cyflwyno'n ffurfiol. Mae Iechyd Cyhoeddus Cymru wedi gallu cymryd rhan lawn, gan ddarparu ymatebion ysgrifenedig a chyfrannu at drafodaethau a gweithdai strwythuredig. Ein rôl oedd darparu cyngor technegol yn ogystal â strategol mewn perthynas â'r materion diogelu iechyd perthnasol y mae'n ofynnol i'r Fframwaith Cyffredin fynd i'r afael â nhw. Bwriad y Fframwaith Cyffredin yw sicrhau cydweithio agos rhwng asiantaethau iechyd y cyhoedd ynghylch diogelu iechyd.

Adroddwyd am ddatblygiad y Fframwaith Cyffredin yn rheolaidd i'n Tîm Gweithredol a'n Bwrdd yn ystod y cyfnod hwn. Derbyniodd y Bwrdd y drafft terfynol mewn cyfarfod ar 11 Awst 2021. Roedd y Bwrdd yn hapus i argymhell y drafft ar gyfer cam nesaf y broses ac, wrth wneud hynny, gwnaethpwyd rhai sylwadau terfynol a wnaeth arwain at newidiadau a gytunwyd hefyd gan Grŵp Goruchwylio'r Pedair Cenedl a'u cynnwys yn y fersiwn derfynol a gyflwynwyd.

Wrth ymateb i'r cwestiynau penodol a godwyd gan y Pwyllgor, lle bo'n briodol, rwyf wedi croesgyfeirio at ymateb Llywodraeth Cymru, ac mae Iechyd Cyhoeddus Cymru wedi cyfrannu at y naratif hwn lle roedd yn briodol gwneud hynny.

Yn ogystal, ar gyfer rhai cwestiynau, rwyf wedi darparu ymateb ychwanegol sy'n benodol berthnasol i rôl a champau gweithredu Iechyd Cyhoeddus Cymru.

2 Cwestiynau Cyffredinol

2.1 Pam bod angen fframwaith cyffredin ar gyfer y maes polisi hwn?

Cyfeiriwch at Ymateb y Gweinidog Iechyd a Gwasanaethau Cymdeithasol.

Cytunodd Iechyd Cyhoeddus Cymru, fel y corff Iechyd y Cyhoedd Cenedlaethol yng Nghymru sy'n gyfrifol am ddiogelu iechyd, fod angen fframwaith i sicrhau bod cydweithredu ar fygythiadau iechyd trawsffiniol difrifol, gan gydnabod pwysigrwydd cydweithredu o'r fath i ddarparu lefel uchel o ddiogelu iechyd dynol ledled y DU. Aseswyd hefyd ei fod yn angenrheidiol i sicrhau y gall y DU fodloni ei rhwymedigaethau rhyngwladol orau o dan y Rheoliadau Iechyd Rhyngwladol. Mae Iechyd Cyhoeddus Cymru wedi ymrwymo i gydweithio â'i asiantaethau iechyd y cyhoedd partner ledled y DU mewn perthynas â'r holl fygythiadau i ddiogelu iechyd.

2.2 Sut y bydd y fframwaith cyffredin hwn yn cysylltu â fframweithiau mewn meysydd polisi cysylltiedig, megis diogelwch bwyd a bwyd anifeiliaid a hylendid ac iechyd a lles anifeiliaid?

Cyfeiriwch at Ymateb y Gweinidog Iechyd a Gwasanaethau Cymdeithasol.

2.3 Mae'r fframwaith dros dro yn nodi y bydd y partïon yn datblygu rhaglen waith a rennir. A fydd y rhaglen waith hon a rennir yn cael ei chyhoeddi?

Mae'r rhaglen waith a rennir yn cael ei datblygu ar y cyd gan Grŵp Goruchwylio Diogelu Iechyd y Pedair Cenedl a derbyniwyd rhaglen waith ddrafft gychwynnol gan Bwyllgor Diogelu Iechyd y DU yn ei gyfarfod cyntaf ym mis Hydref 2021. Mae'r rhaglen waith yn cael ei chwblhau ar hyn o bryd yn dilyn sylwadau gan y Pwyllgor ac mae trafodaethau cydweithredol mewn perthynas â materion cyffredinol o gyfathrebu a chyhoeddi'n parhau. Yn ogystal, bydd gweithredu'r Fframwaith, gan gynnwys y rhaglen waith, yn cael ei ystyried yn unol â'r mecanwaith adolygu a diwygio a amlinellir. Ystyrir hefyd sut i ddiweddarau pob un o 4 deddfwrfa'r DU ar weithredu parhaus y fframwaith hwn, gan gynnwys cyhoeddi'r rhaglen waith, ar ôl i'r broses adolygu hon ddod i ben.

2.4 Mae'r fframwaith yn nodi mai rhan o'i bwrpas yw rheoli'r gwahaniaeth posibl rhwng gwahanol rannau'r DU. Bydd partïon yn ceisio cytuno ar ddulliau cyffredin 'lle bo modd cytuno'. Sut y bydd y partïon yn penderfynu pryd y byddai ymwahanu'n dderbyniol?

Cyfeiriwch at Ymateb y Gweinidog Iechyd a Gwasanaethau Cymdeithasol.

2.5 Sut y byddai'r fframwaith hwn yn effeithio ar drin unrhyw bandemig yn y dyfodol?

Cyfeiriwch at Ymateb y Gweinidog Iechyd a Gwasanaethau Cymdeithasol.

Bydd Iechyd Cyhoeddus Cymru hefyd yn ymwneud â datblygu cynllunio ar gyfer pandemigau yn y dyfodol yng Nghymru, gan gynnwys dysgu gwersi

o'n hymateb presennol. Mae Iechyd Cyhoeddus Cymru wedi ymrwymo i weithio ledled y DU ond hefyd ar sail ryngwladol mewn perthynas â hyn. Rydym yn Ganolfan Gydweithredol Sefydliad Iechyd y Byd (WHO) ar fuddsoddi ar gyfer iechyd a llesiant ac rydym yn aelodau gweithgar iawn o Gymdeithas Ryngwladol Sefydliadau Iechyd y Cyhoedd Cenedlaethol (IANPHI) ac mae'r perthnasoedd hyn yn darparu rhwydwaith cryf ar gyfer rhannu a dysgu rhyngwladol ar y cyd.

3 Y DU a'r UE

3.1 Mae Iechyd Cyhoeddus Cymru wedi codi pryderon yn y gorffennol ynghylch risgiau gadael sefydliadau'r UE ar gyfer diogelu iechyd y cyhoedd a diogelwch iechyd. Sut mae Llywodraeth Cymru ac Iechyd Cyhoeddus Cymru yn lliniaru'r risgiau hyn?

Bwriad y Fframwaith yw cyd-fynd ag, ac ategu, Rheoliadau Diogelwch Iechyd (Ymadael â'r UE) 2021, a fwriedir yn eu tro i gefnogi gweithredu trefniadau'r DU gyda'r UE ar gyfer cydweithredu ynghylch diogelwch iechyd o dan y Cytundeb Cydweithredu Masnach.

Mae Teitl 1 o Ran 4 (Cydweithrediad Thematig) y Cytundeb Masnach a Chydweithredu (TCA), yn cefnogi trefniadau effeithiol a rhannu gwybodaeth rhwng y DU a'r UE os bydd bygythiad trawsffiniol difrifol i iechyd sy'n lledaenu neu'n golygu risg o ledaenu ar draws ffiniau o leiaf un Aelod-wladwriaeth yr UE a'r DU.

I grynhoi, mae'r Cytundeb Masnach a Chydweithredu'n darparu ar gyfer y DU, sefydliadau'r UE ac Aelod-wladwriaethau'r UE i gyfnewid gwybodaeth, asesu risgiau iechyd y cyhoedd a chydlynu mesurau a allai fod yn ofynnol i ddiogelu iechyd y cyhoedd.

Fel rhan o ddull strwythuredig Cymru o ymadael â'r UE, roedd gwaith parodrwydd Iechyd Cyhoeddus Cymru'n canolbwyntio ar fod yn gallu parhau i ddarparu ei wasanaethau hanfodol. Roedd nodi risgiau darparu diogelu iechyd yn rhan o hyn. Yn ogystal, sefydlwyd Is-grŵp Diogelu Iechyd (gan gynnwys Diogelwch Iechyd), a oedd yn adrodd i Grŵp Arweinyddiaeth Iechyd a Gofal Cymdeithasol Llywodraeth Cymru. Roedd yr is-grŵp hwn, o dan arweiniad Iechyd Cyhoeddus Cymru, yn cwmpasu'r risgiau system allweddol a'r gofynion lliniaru sy'n gysylltiedig â chyflawni diogelu iechyd. Enghraifft o risg allweddol a nodwyd gennym sy'n ymwneud â'r berthynas bwysig â'r Ganolfan Ewropeaidd ar gyfer Rheoli Clefydau Trosglwyddadwy (ECDC) mewn perthynas â systemau goruchwylio/rhybuddio am glefydau'n gynnar.

Gan weithio gyda PHE/UKHSA fel Canolbwynt Cenedlaethol y DU, yn ystod y 12 mis diwethaf, mae Iechyd Cyhoeddus Cymru wedi cymryd rhan yn y gweithgorau strategol yn ogystal â thechnegol gan gynnal a datblygu

perthynas barhaus ag ECDC. Roedd hyn yn lliniaru'r risg o ran gwyliadwriaeth/rhybuddio cynnar, ac fe gytunwyd ar y trefniadau diwygiedig yn ystod 2021.

Yn ogystal, mae Iechyd Cyhoeddus Cymru wedi cynnal a meithrin perthnasoedd yn annibynnol gyda phartneriaid asiantaeth iechyd y cyhoedd Ewropeaidd allweddol drwy rwydwaith IANPHI, ein Canolfan Gydweithredol Sefydliad Iechyd y Byd a thrwy nifer o gyswllt dwyochrog ag asiantaethau iechyd y cyhoedd unigol. Rydym wedi cyhoeddi nifer o adroddiadau ar effaith ehangach Ymadael â'r UE. Amlygwyd y camau gweithredu parhaus hyn gan ein gwasanaethau iechyd y cyhoedd/diogelu iechyd datganoledig yn ymateb Bwrdd Iechyd Cyhoeddus Cymru i'r Fframwaith Cyffredin drafft. Arweiniodd hyn at ddiwygio geiriad terfynol yr adrannau perthnasol.

3.2 O dan Reoliadau Diogelwch Iechyd (Ymadael â'r UE) 2021, mae Iechyd Cyhoeddus Cymru a Llywodraeth Cymru wedi ymgymryd â rhai cyfrifoldebau a arferwyd yn flaenorol ar lefel yr UE, megis cynrychioli Cymru ym Mhwyllgor Diogelu Iechyd newydd y DU. A allech gadarnhau pa gyfrifoldebau newydd y bydd Iechyd Cyhoeddus Cymru a Llywodraeth Cymru yn ymgymryd â nhw a pha adnoddau a ddyrannwyd ar gyfer hyn? Sut mae'r trefniadau newydd yn wahanol i'ch trefniadau blaenorol pan oedd y DU yn Aelod-wladwriaeth o'r UE?

Cynrychiolir Iechyd Cyhoeddus Cymru ar Bwyllgor Diogelu Iechyd y DU (gan y Cyfarwyddwr Cenedlaethol ar gyfer Gwasanaethau Diogelu Iechyd a Sgrinio/Cyfarwyddwr Meddygol Gweithredol) a Grŵp Goruchwyllo Diogelu Iechyd y Pedair Gwlad (gan y Dirprwy Gyfarwyddwr Cenedlaethol ar gyfer Diogelu Iechyd a Gwasanaethau Sgrinio). Mae cefnogaeth i'r swyddogaethau hyn wedi'i nodi o'r tu mewn i'r cyllidebau presennol. Dylid nodi bod Iechyd Cyhoeddus Cymru ar hyn o bryd yn darparu rôl y cadeirydd ar gyfer blwyddyn gyntaf Grŵp Goruchwyllo Diogelu Iechyd y Pedair Gwlad. Mae cadeirydd Pwyllgor Diogelu Iechyd y DU yn y flwyddyn gyntaf gydag Adran Iechyd a Gofal Cymdeithasol Lloegr. Bydd cadeirydd y Pwyllgor a Grŵp Goruchwyllo Diogelu Iechyd y Pedair Gwlad yn cylchdroi bob blwyddyn.

3.3 Bydd Asiantaeth Diogelwch Iechyd y DU (UKHSA) yn cyflawni rhai swyddogaethau cydlynu a arferwyd yn flaenorol ar lefel yr UE. A yw Llywodraeth Cymru yn fodlon bod gan UKHSA ddigon o adnoddau i gyflawni'r swyddogaethau hyn?

Cyfeiriwch at Ymateb y Gweinidog Iechyd a Gwasanaethau Cymdeithasol.

4 Rhyngwladol

4.1 A yw Llywodraeth Cymru yn fodlon bod y fframwaith yn ystyried ei hymrwymiaidau rhyngwladol presennol?

Cyfeiriwch at Ymateb y Gweinidog Iechyd a Gwasanaethau Cymdeithasol.

4.2 Cyflwynwch asesiad Llywodraeth Cymru ynghylch sut mae'r fframwaith yn darparu ar gyfer gwahaniaethau ac aliniad rhwng ymrwymiaidau a gweithgarwch iechyd rhyngwladol y pedair gwlad, er enghraifft MOU Llywodraeth Cymru â Sefydliad Iechyd y Byd ynghylch tegwch iechyd neu ei chymorth diogelu iechyd y cyhoedd i genhedloedd Affrica yn ystod y pandemig.

Cyfeiriwch at Ymateb y Gweinidog Iechyd a Gwasanaethau Cymdeithasol.

4.3 Cadarnhewch sut yr ystyriwyd rhwymedigaethau rhyngwladol presennol a'u hymgorffori yn y fframwaith ac eglurwch sut y bydd rhwymedigaethau yn y dyfodol yn cael eu hymgorffori.

Cyfeiriwch at Ymateb y Gweinidog Iechyd a Gwasanaethau Cymdeithasol.

4.4 Rhowch ragor o wybodaeth am rôl Llywodraeth Cymru neu gyrff Cymru wrth gyflawni agweddau rhyngwladol y fframwaith. Er enghraifft, a yw'r fframwaith yn darparu cyfleoedd ar gyfer rôl ddatganoledig yn natblygiad polisi tramor y DU, fel y darperir mewn fframweithiau eraill.

Cyfeiriwch at Ymateb y Gweinidog Iechyd a Gwasanaethau Cymdeithasol.

4.5 Cadarnhewch a yw'r fframwaith yn darparu cyfleoedd i gynrychiolaeth o Gymru mewn fforymau rhyngwladol, naill ai gan Lywodraeth Cymru neu gyrff Cymru.

Cyfeiriwch at Ymateb y Gweinidog Iechyd a Gwasanaethau Cymdeithasol.

Bydd Iechyd Cyhoeddus Cymru hefyd yn parhau i feithrin cysylltiadau rhyngwladol uniongyrchol ag asiantaethau iechyd y cyhoedd eraill sy'n berthnasol i ddiogelu iechyd. Mae hyn yn cynnwys drwy rwydwaith IANPHI, ein Canolfan Gydweithredol Sefydliad Iechyd y Byd a chyswllt ag asiantaethau iechyd y cyhoedd unigol.

5 Anghydfodau

5.1 A yw Llywodraeth Cymru yn fodlon bod y mecanwaith datrys anghydfodau ar gyfer y fframwaith yn addas at y diben?

Cyfeiriwch at Ymateb y Gweinidog Iechyd a Gwasanaethau Cymdeithasol.

5.2 Pwy fydd y canolwr terfynol pe bai anghydfod, ac a fydd hawl i apelio os bydd un o'r partïon yn anfodlon ynghylch sut y datrysir anghydfod?

Cyfeiriwch at Ymateb y Gweinidog Iechyd a Gwasanaethau Cymdeithasol.

Profiad Iechyd Cyhoeddus Cymru o ddelio ag asiantaethau iechyd y cyhoedd eraill yn y DU mewn perthynas â darparu gwasanaethau diogelu iechyd, yw bod lefel uchel o barodrwydd yn gyffredinol i chwilio am ddatrysiadau sy'n dderbyniol i'r ddwy ochr, ac felly rhagwelir y bydd y trefniadau a ddarperir gan y Fframwaith yn ddigonol i alluogi canlyniadau boddhaol yn y mwyafrif helaeth o achosion o anghydfod posibl. Pe bai amgylchiad eithriadol ac annisgwyl yn codi yn y dyfodol lle nad oedd hyn yn bosibl, yna mae'r Fframwaith Cyffredin yn caniatáu i faterion gael eu cyfeirio at y Prif Swyddogion Meddygol yn y lle cyntaf. Mae Iechyd Cyhoeddus Cymru wedi ymrwymo i gefnogi Prif Swyddog Meddygol Cymru mewn amgylchiadau o'r fath.

5.3 A fydd Llywodraeth Cymru'n hysbysu'r Senedd am anghydfodau a godwyd drwy'r fframwaith?

Cyfeiriwch at Ymateb y Gweinidog Iechyd a Gwasanaethau Cymdeithasol.

6 Tryloywder ac atebolrwydd

6.1 A wnaeth Llywodraeth Cymru ac Iechyd Cyhoeddus Cymru ymgysylltu ag unrhyw randdeiliaid yng Nghymru i ddatblygu'r fframwaith dros dro? Sut mae'r fframwaith dros dro yn adlewyrchu ymateb rhanddeiliaid?

Mae ymgynghori'n helaeth â'r gweinyddiaethau datganoledig ac asiantaethau iechyd y cyhoedd y DU, ac ymgysylltu â nhw, wedi digwydd wrth ddatblygu'r Fframwaith a'r Rheoliadau Diogelwch Iechyd (Ymadael â'r UE). Defnyddiwyd Grŵp Pontio'r UE Diogelu Iechyd y Pedair Gwlad, a oedd yn cynnwys cynrychiolwyr o Lywodraeth y DU, y Gweinyddiaethau Datganoledig ac asiantaethau iechyd y cyhoedd y DU, fel y prif fforwm i drafod datblygu polisi. Roedd hyn yn cynnwys tri gweithdy undydd a gynhaliwyd yn Llundain, Caerdydd a Belfast, yn ogystal â chyfarfodydd bob pythefnos i symud ymlaen â'r gwaith ar y Fframwaith yn ogystal â'r Rheoliadau drwy gydol 2020 a 2021.

Mae Iechyd Cyhoeddus Cymru wedi adrodd am ddatblygiad y Fframwaith Cyffredin i'w Fwrdd ei hun a hefyd i'r Grŵp Cynghori ar Ddiogelu Iechyd y Prif Swyddog Meddygol. Mae'r grŵp amlasiantaethol hwn yn cynnwys cynrychiolwyr o Lywodraeth Leol, Byrddau Iechyd (Cyfarwyddwyr Iechyd y Cyhoedd), swyddogion Llywodraeth Cymru ar draws ystod o feysydd portffolio a phartneriaid allweddol eraill. Mae Iechyd Cyhoeddus Cymru yn

parhau i roi'r wybodaeth ddiweddaraf i Gyfarwyddwyr Iechyd y Cyhoedd drwy gyfarfodydd arweinyddiaeth system arferol

Arweiniodd Adran Iechyd a Gofal Cymdeithasol Lloegr yr ymarfer ymgysylltu â rhanddeiliaid ar gyfer y Fframwaith, ac roedd hyn yn cynnwys Iechyd Cyhoeddus Cymru.

Gwnaeth Iechyd Cyhoeddus Cymru arsylwadau a sylwadau ysgrifenedig drwy gydol y broses a chymryd rhan mewn nifer o sgysiau penodol gyda'r ysgrifenyddiaeth i sicrhau bod materion sy'n berthnasol i Gymru yn cael eu hystyried. Derbyniodd Bwrdd Iechyd Cyhoeddus Cymru y drafft terfynol mewn cyfarfod ar 11 Awst 2021. Roedd y Bwrdd yn hapus i argymhell y drafft ar gyfer proses y cam nesaf ac wrth wneud hynny gwnaeth rai sylwadau terfynol a dderbyniwyd ac a arweiniodd at newidiadau i'r fersiwn derfynol.

6.2 Sut y bydd y Senedd a rhanddeiliaid yn cael eu diweddarau am barhau i weithredu'r fframwaith?

Cyfeiriwch at Ymateb y Gweinidog Iechyd a Gwasanaethau Cymdeithasol.

6.3 Sut y bydd y Senedd a rhanddeiliaid yn gallu cyfrannu at y broses adolygu a diwygio'r fframwaith?

Adolygir gweithrediad y Fframwaith ar ôl chwe mis, un flwyddyn a thair blynedd o'r dyddiad y daw i rym. Wedi hynny, cynhelir adolygiad cyfnodol bob tair blynedd. Bydd Iechyd Cyhoeddus Cymru yn cymryd rhan lawn yn yr adolygiadau hyn, y mae'r cyntaf ohonynt wedi'i drefnu ar gyfer 2022.

Yn amodol ar farn y Pwyllgor, efallai y bydd cyfle iddo alinio gweithgarwch craffu cyfnodol mewn perthynas â'r Fframwaith â llinell amser yr adolygiadau hyn.

Gobeithio bod yr ymateb hwn o gymorth i'r Pwyllgor ac mae croeso i chi gysylltu â mi os gallwn helpu mewn unrhyw fodd.

Yr eiddoch yn gywir,



Dr Tracey Cooper
Prif Weithredwr, Iechyd Cyhoeddus Cymru

Copi: Syr Frank Atherton, Prif Swyddog Meddygol
Dr Fu-Meng Khaw, Cyfarwyddwr Cenedlaethol Diogelu Iechyd a
Gwasanaethau Sgrinio/Cyfarwyddwr Meddygol Gweithredol, Iechyd
Cyhoeddus Cymru